

RIJEČ REDAKCIJE

Redakcija *Priloga*¹⁾, koja je vršila i ulogu redakcije za pripremu i organizaciju međunarodnog naučnog skupa pod naslovom *Historiografija o Bosni i Hercegovini*, na sjednici održanoj 3. februara 2000. godine odlučila je da se svi materijali sa naučnog skupa (referati, diskusioni prilozi, riječ akademika Envera Redžića, referat dr. Ibrahima Karabegovića i pozdravni telegrami u povodu četrdesetogodišnjice postojanja i rada Instituta, objave u broju 29. *Priloga*. Na istoj sjednici je donesena odluka da se ovaj broj 29 *Priloga* posveti akademiku Enveru Redžiću, bivšem direktoru Instituta za istoriju u Sarajevu, a u povodu 85-te godišnjice života i plodonosnog rada. S tim u vezi u *Prilozima* je objavljen tekst dr. Tomislava Iška o životnom putu i naučnom opusu akademika Envera Redžića, kao i bibliografija njegovih najnovijih radova, koji su objavljeni u periodu od 1991. do 1999.² Kako se vidi, najveći dio sadržaja ovog broja *Priloga* čine materijali sa naučnog skupa.

Suorganizator međunarodnog naučnog skupa pod navedenim naslovom, koji je održan u Sarajevu 4. i 5. 11. 1999. godine u okviru četrdesetogodišnjice postojanja i rada Instituta za istoriju u Sarajevu, bio je Hrvatski institut za povijest u Zagrebu. Redakcija se i ovom prilikom najljepše zahvaljuje gosp. dr. Mirku Valentiću, ravnatelju pomenutog instituta i njegovim naučnim saradnicima, koji su aktivno učestvovali u radu međunarodnog naučnog skupa.

Međunarodni naučni skup *Historiografija o Bosni i Hercegovini* je nastavak Savjetovanja o historiografiji Bosne i Hercegovine (1945-1982.), koje je održano u Sarajevu 11. i 12. februara 1982.godine.³ Osnovni ciljevi naučnog skupa i pomenutog savjetovanja su veoma bliski: jedan od osnovnih ciljeva je valorizacija postignutih rezultata posljednje dvije decenije (od 1982. do 1999.) u Bosni i Hercegovini i van njenih granica. Koliko se u tome uspjelo, prepuštamo sudu naučne javnosti. Referati i diskusioni prilozi publikovani su u obliku u kojem su prezentirani na naučnom skupu, pa i oni koji sadrže mišljenja i ocjene koje ne dijele članovi Redakcije. Zato ističemo da izložena gledišta odražavaju isključivo stavove autora.

1. Za ovaj broj *Priloga* redakcija je proširena sa dr. Mirkom Valentićem, ravnateljem Hrvatskog instituta za povijest u Zagrebu i dr. Verom Kržišnik-Bukić, naučnom savjetnicom u Institutu za nacionalno pitanje u Ljubljani. Isto tako, redakcija *Priloga* na sjednici od 3. februara 2000. godine, donijela je odluku da u sastav redakcije ude gosp. Robert Donia, University of Michigan.
2. Bibliografija radova akademika E.Redžića nastala do 1990.godine objavljena je u *Zborniku radova* povodom 75.godišnjice života akademika Envera Redžića, ANUBiH, Posebna izdanja, Knjiga XCII, Odjeljenje društvenih nauka, Knjiga 25, Sarajevo 1990, str.11-23.
3. *Savjetovanje o istoriografiji Bosne i Hercegovine (1945-1982)* ANUBiH, Posebna izdanja, Knjiga LXV, Odjeljenje društvenih nauka, Knjiga 12, Sarajevo 1983.god.